

Meeqqap napparsimanerani ullormi siullermi pisinnaatitaaffiup annertusarnissaanik periarfissat kiisalu angerlarsimaffimmi meeqqamik napparsimasumik paarsinissamut angajoqqaanik pitsaanerusumik periarfissiinissamut ataqatigiinnerusumik aaqqiinermik pilersitsinissaq pillugit nalunaarusiamik suliaqarnissamik Naalakkersuisut peqquneqarnissaat pillugu Inatsisartunit aalajangiiffigisassatut siunnersuut. Suliffeqarnermut peqataasut oqaloqatigalugit tamatumunngalu peqatigitillugu periarfissani assigiinngitsuni aningaasaqarnermut aamma allaffissornermut kingunissai qulaajassallugit nalunaarusiaq suliarineqassaaq.

(Inatsisartuni Ilaasortaq Pipaluk Olsen, Demokraatit)

Akissutitut allakkiaq

(Isumaginninnermut, Suliffeqarnermut, Ilaqutariinnut Nunamullu Namminermt Naalakkersuisoq)

Siullermeerneqarnera

Naalakkersuisut sinnerlugit, Inatsisartuni Ilaasortaq Pipaluk Olsen, Demokraatit siunnersuummut qutsavigiumavara. Meeqqap napparsimanerani ullormi siullermi pisinnaatitaaffiup annertusarnissaanik periarfissat kiisalu angerlarsimaffimmi meeqqamik napparsimasumik paarsinissamut angajoqqaanik pitsaanerusumik periarfissiinissamut ataqatigiinnerusumik aaqqiinermik pilersitsinissaq pillugit nalunaarusiamik suliaqarnissamik Naalakkersuisut peqquneqarnissaat, Siunnersuut nassataqarmat.

Suliffeqarnermut aammalu pisussaaffinnut allanut naleqqiullugu ulluinnarni inuuniarnermut meeqqap napparsimanera angajoqqaanut ajornartorsiortitsisinnaasoq Naalakkersuisunit ilalerneqarpoq.

Nunani avannarlerni allani, meeqqap napparsimaneranut atatillugu, sulinngitsoornermut assigiinngisitaartunik aaqqissuussaqarpoq.

Danmark-imi meeqqap napparsimaneranut ullormut siullermut kiffaangissuseqarsinnaatitaanermut, aallaavittut ataatsimoorullugit isumaqatigiissusianik aammalu suliffeqarfimmi isumaqatigiissutinik atuinikkut maleruagassiugaavoq. Sulisunut tamanut inatsisitigut aalajangersakkamik aaqqiinermik peqanngilaq, taamaattoq pisortani aammalu namminersortuni suliffeqarfinni amerlasuuni, meeqqap napparsimanerani akissarsiaqartitsisumik imaluunniit akissarsiaqartitsinngitsumik kiffaangissuseqarnissamut periarfissaqartitsiviuvoq.

Meeqqap napparsimanerani aaqqissuussanik assigiinngisitaartunik ilusilersuisoqartarnera, Nunani Avannarlerni misilittakkat ersersippaat. Taamaattoq aaqqissuussat taamaattut imaaliiallaannaq Kalaallit Nunaanni pissutsinut nuuinneqarsinnaasannngillat, tamatumani suliffeqarnerup annertussusia, isumaqatigiissuteqarnermik pissutsit, sulisitsisut ilusilersugaanerup, allaffissornerup artunngisaa aammalu pisortat aningaasaqassusiat, naliliinermi ilaatinneqartussaammat.

Meeqqap napparsimanerani kiffaangissuseqarnissamut angajoqqaat periarfissaat pillugu apeqqut, suliffeqarnermi peqataasunik oqaloqateqarnertigut ineriartortinneqassasoq,

Naalackersuisunit pingaartutut isigineqarpoq. Kalaallit Nunaanni branche-nik aammalu suliffeqarfinnik assigiinngisitaartunik eqqarsaatiginnittumik oqaloqatigiinnerit taamaattut aaqqiissutissanut iluaqutaasinnaapput. Tamatumunnga peqatigitillugu ilaqutariinni meeralinni naammaginantumik piffissamullu naleqquttumik atugassaqtitaanissamut naleqqiullugu suliffeqarnermi isumaqatigiissusiat aammalu isumaqatigiissutit pingaaruteqartut Naalackersuisut najoqqutatut isummernerivaat.

Taamaattumik, meeqqap napparsimanerani kiffaanngissuseqarnissaq pillugu siunissami aaqqiissuussaasinnaasut, suliffeqarnermi peqataasut qanittumik attavigalugit, ineriartortinneqartariaqarnerisut, Naalackersuisunit nalilerneqarpoq. Sulinermi kiffaanngissuseqarneq, akissarsiassaraluanik taartisiaqartitsisarneq, sulisitsisunut pisussaaffiliisarneq aamma allaffissornikkut kingunissai pillugit apeqqutit, peqataasut attuumassuteqartut akornanni peqqissaartumik oqaloqatigiissutigineqarnissaannik pisariaqartitsiviuvoq.

Allannguutissatut siunnersuut eqqarsaatigalugu, ilusilersukkamik aalajangersimasumik, ilaatillugit aaqqiissuussinerusinnaasup inatsisitigut maleruagassiugaassanera, isumaqatigiissutinik tunngaveqassanera, sulisitsisunit aningaasalersugaassanera imaluunniit pisortanit aningaasalersugaassanera pillugu, Naalackersuisut isummiussaqaanngillat. Aningaasaqarnikkut imaluunniit allaffissornikkut kinguneqartussat ilusilersugaasinnaasut, immikkut politik-kikkut isummerfiginninnermik aamma aningaasaliiffiginninnermik piumasqaateqarfiussapput.

Meeqqap napparsimanerani kiffaanngissuseqarneq pillugu ammasumik oqaloqatiginninneq Naalackersuisunit ajunngitsutut isigineqarpoq taamaattumillu, suliassaqarfimmi siunissami aaqqiissutaasinnaasut pillugit suliffeqarnermi peqataasunik oqaloqatigiissutiginninnissanut piareersaatilik suliniuteqarlutik.

Taamatut oqaaseqarlutik allannguutissatut siunnersuummik tulliuuttumik Naalackersuisut innersuussuteqarput:

”2027-imi meeqqap napparsimanerani angajoqqaat kiffaanngissusaat pillugu suliffeqarnermut peqataasunik oqaloqateqarnerit inernerinik saqqummiussinissamik Naalackersuisut peqquneqarnissaat pillugu Inatsisartunit aalajangiiffigisassatut siunnersuut.”